

天目先生集

天目先生集卷之十六

吳興徐中行子與著

墓志銘

明通議大夫都察院右副都御史贈兵部
左侍郎熊公墓志銘

公開府南越卒于軍

上賜祭葬以某年月葬于某山同舉嘉靖庚戌
進士徐某按家狀志之其先山西陽曲人自宋
季二生元轉運判萬安一傳徙武寧又一傳徙

武昌曰世昌者生安縣令友信友信生散官錢
鑑生南海丞清娶萬氏三子極爲經歷棧爲千
戶公名桴字元乘以正德丁卯正月九日生先
有丹鳳紅日之夢幼穎敏敦龐不好弄而力學
十六受博士詩凡二十二年乃舉七年而仕故
其蘊藉甚深試政戶部使通州巡撫王公太倉
州人知其材求爲州守州行田挈租重變海者
賦如故他墾則侵于衛卒均之凡二千二百餘
石龍衣內官尉卒求艘橫甚治之編戍者五

時日本寇嘉定上海援之累有戰功。寇州巡城立矢石間。冠中二矢三關爲寇燬。擊却之而出。操江都御史渡海城。屬邑崇明寇復大至。開關納境外民及旁邑者數萬。巡城昧爽隱几忽警。而呼燭召將士雲梯數十乘及堞矣。擊却之境內完。且援崑山。莫不多其賢勞。當超遷以備兵。操江都御史坐困太倉落職歸罪。于公當御史逮。士民泣不能留。隨之逮所甚衆。事白稍遷蘇州同知。練鄉兵破寇。二次賜金城福山以固郡。

咽喉陞河南僉事轉副使居太倉備兵于蘇及
松江督餉兼水利凡六年開太倉楊林河入于
海崑山瓦浦入于江虹江自嘉定入上海注吳
淞入海白茆自太湖入海大水請蠲數萬石城
柘林川沙吳淞三堡請總兵軍吳淞游擊軍金
山柘林川沙各置部將轄青村南匯村官皆關
大計入浙會督府以密計禽渠魁王直又破寇
于三沙白駒賜金南都衛卒亂于是福山卒
崇明吳淞客兵輒譟戮其首亂而撫之金山卒

求禪將圍御史千松公令開關不敢入就而解
散焉陞雲南參政上官妻素儀稱兵請假以權
攝州事而罷遷陝西按察使留平易門霜益等
寇之陝因昔忤御史左遷山東參政備兗東

景國過之供帳而民不擾會河塞徐沛大司空
衡命治之築堤遏沙河衝塞牛溝以南會薛河
薛河高其防使淫之而泥善下隆慶改元陞山
東按察使加俸二級河功成也尋轉浙江右布
政使是時曾一本亂南越南越人都御史何公

以公請于部乃以右僉都御史開府六月兼程
入境一本解會城圍去以舟師討之虎頭門遂
大破諸縣山賊而撫其餘黨一本誘日本襲破
碣石衛甲子所逼惠州大兵持一本于潮州公
不俟援即日往惠州適參將部下殺將反攻城
不克授日本遂行間令日本擒酋殺其黨南贛
援至討日本于平山追至碣石并叛卒盡滅之
賜金幣力疾入潮會閩師討一本一本曾敗閩
師于馬甘澳茲聞稍勝輒敗諸將益懼公命縛

關將乃死戰獲一本先是平張璉等執渠魁數人吳平逃於安南餘黨至是始平公疾革猶口授發兵給餉狀不及家事卒隆慶己巳七月二十四日也壽六十三潮昔未有開府皇皇至乃晏堵卒而奔號立祠于金山以一本功進右副都御史賜金幣賻予入太學文以征日本功贈兵部左侍郎議諡今祀武昌縣鄉賢祠昔去蘇松太倉已立生祠則公之伐可不朽矣其又以號稱曰鏡湖集及撫越疏議已詳所履余

勸其最著于茲夫人荆府教授陳繼芳女也子
二皆廩生熾補廕煥補太學生孫十履初有初
如初迪初完初熾出復初篤初慎初嗣初正初
煥出補弟子員四人孫女二熾煥各一銘曰烈
烈開府史不勝書大者兵旅其次河渠生榮廩
宇歸宜其居嗟夫有鬱斯所蓋昭茲來許者與
明故中憲大夫福建按察司副使雨樓陸
公墓志銘

萬曆丙子夏公以福建按察司副使雨樓陸公

冬余以按察使入覲丁丑轉右布政使于江
西過家展墓公之孤四人奉其邑諫議嚴君狀
來謁曰先大夫之喪賴明使君歸首丘故邈諸
孤敢致遺命圖不朽余與公同舉而同官卒旣
周旋其事而于銘其曷辭公諱相儒大行其字
雨樓別號也先爲吳興人出唐別駕陸旆之後
國初有諱貞四者生彥祥由吳興徙嘉興彥祥
生散官皐皐生儒官璧璧生封君潛配姚氏而
生公公生之前夕封君夢鼓吹導金紫貴人至

其家故公岐嶷有奇徵而授博士書嘉靖庚子
舉于鄉己未舉進士除營繕司主事視通州廠
營皇極殿徵材孔亟督發有程甕甕給將作
不乏部運吏故有例金數千而革之殆盡辛酉
景府分封駕說潞河猝營行宮而民不知擾
大工告成尚書雷公將上狀公當晉秩二級而
自言於雷公臣無狀願滿考貤封于二親不願
亟遷秩有將薦改駕部俱辭壬戌以考最封父
如已官母宜人尋轉都水員外進郎中管琉璃

河塘不越月而竣，改督修蘆溝橋，工鉅費廣而
並者多以墨敗。公獨皦然，免于訾議。尚書呂公
歎曰：「陸郎冰清玉潔人也。」癸亥有易，厥之命
厥故給內宮薪炭，歲課四十萬，出自畿輔齊
魯之區，往往多豪右，歲逋十六七。主者率破產
莫可支，公行部籍豪右，裁以法而定徵輸之限。
嚴逋負之禁，民始息肩。歲課乃登。甲子陞知延
平府。北山賴中潭爲亂，時議調兵勦之。公力持
撫之，便而中潭面縛自首。餘黨悉解。公曰：「嗟夫，

盜皆吾民。今民病疫如盜。何上書部使者行條
編法而下其書諸郡。民稱便。已乃立鄉約清驛。
傳列河兵勸士右文。郡中大治。鄉書禮闈視他
科爲盛。戊辰以覲考最進。封父如已官。母恭
人復任者二載。不以家從官。舍蕭然而不以久
淹爲念也。已已陞貴州兵備副使去。而延民伐
石爲記。庚午適貴陽土酋安國亨拒命。官軍討
之不克。聞公至百里外。釋兵稽首願自新。公尋
以外艱去。而國亨復叛。明年丁內艱。甲戌服闋。

除福建監軍副使兼攝驛傳綜核靡密而多所
減省。會有變條編法爲所堅執不采變時閩海
未弭公督餉簡戎擇將領飭邊防而粵盜林鳳
不敢闖乙亥夏島夷將入犯公遣材官逆于海
有斬獲功閩人方倚爲重而公以勞臥疾于六
月十一日不起矣距生正德丙子二月十二日
春秋六十有一配顧恭人先卒三十七年繼娶
爲吳恭人子鳴臯國子生娶中書王化女繼娶
國子生計萬全女鳴陽邑庠生娶工部郎中孫

紹女繼娶庠生周采女鳴鳳邑庠生娶國子生
馮敏效女繼娶封主事屠孟玄女鳴世聘國子
生沈茂完女女二一適庠生張夢得一適庠生
張世元孫男三人墓在某山之原負某面某以
某月日葬嗟夫公狀恂恂而若不勝衣至其持
論守經類能必行其志蓋其質行之樹于家鄉
者素矣當伏枕時而語家人曰我當乞骸骨而
歸臥雨樓之上矣可自長官爲我圖之未幾大
漸執蓮花一枝顧笑夫人曰我平生無瘡人者

而清修其庶幾於是乎。余遂爲殮而歸櫬去。閩中民莫不哀過延津而慟者衆。謂之全歸非邪。故宜爲之銘。銘曰。

士重者廉。嗟惟汝賢。水部一麾。厥守彌堅。六年遺澤。垂于延津。護軍之伐。昭茲七閩。易萃厥躬。鞅掌之故。閩中其恫。延津孔慕。首丘故山。亦堂亦斧。過者下車。曰君子所。

明封中憲大夫山東濟南府知府顧貞魏
先生墓志銘

先生諱正蒙字汝開蒲圻人也其先徙自沔陽而代有聞人至碧以處士稱二子舉鄉薦而爲邑令法爲樂安溶爲鄰水鄰水記名宦語具楚紀稱質菴公先生父也母袁氏生子三伯正時有文學名仲正初舉鄉薦知蓬州遷長史季爲先生少從兩兄學蔚有文藝又工書得右軍法鄰水廉無美衣鮮食先生從之隱約若將終身居二親喪哀毀踰禮廬於墓次讀三國志至玄德關張恩若兄弟而歎曰友善且然况同胞乎

兄弟執書以泣。不知涕之從出也。蓋從兩兄居食三十年。疾必躬嘗湯藥。不以父母沒少衰。初仲兄未舉子。先生子裳方十歲。遂遣從南游。明年嫂氏就館卒。先生乃爲輦乳婦乳之。而召裳歸。裳以庚戌進士爲比部尚書郎。使人迎先生于邸。而不往。曰。兒甫受事。當報。

主而翁無恙。其勿念。三何裳有內之喪。請急歸。復迎先生。辭如故也。于是裳御母李恭人如京。師恭人留媵奉先生巾櫛。而就邸舍撫諸孫。就

外傳歸輒夕爲澣衣旦衣以往而裳所雅素歷
下李于鱗吳郡王元美京山高伯宗武昌吳明
卿及中行間以好古相命恭人輒具酒炙縱裳
交諸子驪如奉先生在御有雞鳴雜佩風甲寅
恭人卒裳奉喪歸丁巳補北部郎戊午報政
封先生如子官贈母太恭人是年秋裳克江
南使者諸郡獄過里門先生曰兒胡爲乎歸
邪諸國郡獄日從使者可以老夫後事哉裳
進獻竣事疏上便省則後母方孺人卒壬戌春

囊起家知山東濟南府事癸亥先生如濟南囊
適以公事過于濟寧遂從登太山丈人峯與諸
父汝山弟表子樸如前爲壽濟南邵武翟濤輩
酌酒賦詩甚驩濤曰漢陳留之會于斯而二矣
遂名其巖曰德星爲文勒石李于鱗及諸士大
夫爲賦岱宗奇祝先生曰吾登名山適初度辱
諸大夫祝信奇哉無何歸德濱臨邑諸守令各
使人餽金道中先生曰吾不可以黠賢子名謝
不受乙丑囊上計京師遂報政而先生封知

府 贈李母太恭人裳是年夏擢山西憲副奉
勅潞安兵備分巡冀南便道歸省先生曰吾每
誦曾子事君不忠非孝也有味乎其言兒久膝
下如 簡書何未浹旬趣裳西至則大同兵事
嚴矣尋罷歸先生曰兒今豈自適哉裳意得甚
色養者五年而先生卒時隆慶己巳十二月二
十一日也距生弘治戊午四月十七日享年七
十二先生生平篤友義里中談裕中劉德章皆
故交也談死而爲之殯數賑劉之遺孤內兄李

信王無後，裝送其二女，甚具其趨人之急類如此。然終未嘗有德色，人莫不稱長者，而喜其食報千裳云。子四，長裳娶贈恭人劉氏，續鄧氏，封恭人。震震媵出，年未卹，女二媵出，適廖欽，字龔梓，孫男四，樸如舉鄉薦，彬如邑學生，次標如次樂如，孫女二，一適知府鄧廷猷，子士達，一聘咸寧趙氏。曾孫三，說訐諡裳，筮于某年某月某日奉先生柩與李恭人合葬于某山之原，需銘于中行，亡何而裳逝矣。嗟夫，恭人窀穸則王元美

銘之先生歎曰辱名士言死且不朽中行不仕孰與元美第許先生之子久矣而敢負之九泉哉雖非名言其烏敢辭銘曰

爲廉吏子疏食終窶爲廉吏父餽金弗顧旣銘于岱而藏于楚矧茲恭人先歸爲伍

明故封君北岡余先生墓志銘

按由余入秦其後以余爲姓蓋散居三楚間南昌自宋邦佐顯明興東溪有給事洪石鎮有州守麟黃山有上元令韶接坡有蒲溪令棠岡

南有閩憲副曰德，字德甫，先生之伯子也。滿三載當考，先生貽之書曰：我先世咸淳十年而三第乃遇，非時今其時矣。給諫公不及二千石，而何幸及此。我且老宜歸，德甫遂具休疏。會有疆事，弗敢上，而循吏奏最當得封，則歸養，屬虜警，停請，忽中飛語罷。先生所稱封君，德甫三載刑部郎所考也。德甫歸而跽謝曰：曰德無狀，不能屢封大人，奈何？先生歎曰：昔以趨而歸，我以白衣衣繡，秩過于給諫，公足矣。矧而待我餘年乎？

迨中行至南昌先生沒五載而戒寢窆謁銘宗
室用晦爲狀具先生頗詳不詳德甫所由罷蓋
其中飛語以嚴相胄子之妻黨也新安汪伯玉
嘗頗序其故然知之莫深於中行昔與德甫爲
同舍郎當同出使故事辭相府而行嚴相愕然
曰里人多稱余君賢何嚮者之不左顧也中行
出以告司寇海鹽鄭公公賢而屢稱之旣聞于
羣紳間章章矣蓋爲郎七載而乃得憲副于相
何與焉當相罷而從之豈非命也哉豈非命也

哉先生善言命知不當再封故趣之歸而徵之
先世云其先自邾佐生必登由黃山徙武陽里
五傳入國初有仕節任節生孟紳徙岡南生

子良子良生泰稱訥菴公娶閭溪羅氏生先生
名敘字良倫避祖諱改字仲倫世以尚書隱居
教授先生少從父學學憲北地李獻吉試高第
斯博士弟子未上會父爲里豪所誣椎莫能對
乃出以代頌擊三年事白業廢而產益旁落
則以教授自給門下多名士武昌侍郎朱公爲

御史時聘塾其子而相友善。先生言命踰五十
當貴。朱公然之。第旣罷業所貴之謂何。及見德
甫文而大喜曰。師所以貴者在此子也。德甫尋
列博士弟子高第。從敎授者四至。束脩足佐朝
夕。其母喪勿有悔。先生無勞于拮据矣。逾五十
而嘉靖丙午。德甫舉鄉薦。庚戌成進士。以言命
旣徵。乃愈務挹損。比初受封。德甫飭冠服而進。
一再試。輒筭之曰。以而顯我足矣。我野服良便
也。時歷下李于鱗。吳郡王元美爲刑部郎。而倡

古聲詩。德甫與武昌吳明卿廣陵宗子相南海。
梁公實蜀中張肖甫及中行爲同年友游從其
間甚驩。先生喜曰。大江以西唱自北地。僅得熊
士選者。稍與之同聲耳。時我以家難而不登李
君門命也。今有六七君子視李君多矣。兒幸與
之游。而圖不朽盛事。所以顯我者。其尤在斯乎。
迨德甫使治兩浙獄歸。過家起居。上平反狀。先
生益喜。出笥中衣置酒。高會父老而勞之曰。漢
于公一獄吏。陰德與其後人。平反及數百子孫。其

庶幾乎德甫至固以其海錯絲枲爲壽先生不
懌曰我所習者褐衣芋栗耳自是問安否不敢
有所仿比歸先生迎而謂之曰三載之奉我未
嘗再享今索則垂矣我不爲廉吏父乎而爲吏
者何慊也于是德甫安意明農于畝甘其養至
家堂災歷八載歲久不能葺弗問向所游六七
君子者多屏居故里時時尺牘詩什相慰存先
生間手之曰兒得與齊名我死可無憾矣先生
好賦詩第取適意爾於德甫詩始彈射而終激

賞之父子竊相樂而慈孝風里閭爲鄉飲賓二十餘不數數赴其履城市則可數也德甫侍養十一年矣萬曆癸酉元美爲作余翁傳稱其寬中少忤素供絕醲宜壽顧是年正月無恙而語德甫曰我氣少短殆將終矣迄三月朔疾作踰四日整衣冠而逝距生弘治壬子正月初九日蓋年八十二矣配萬氏里中處士宗元女贈太安人先卒三十二年繼娶蔣氏無出子二皆萬出也伯憲別娶進賢李氏封安人仲口徵郡學

生娶同邑徐氏又王氏女一嫁同邑吳一夔孫
男八棐樂樂樂其一幼俱憲副出泉榮采俱曰
徵出而棐榮俱博士弟子孫女二人曾孫二耀
棐出泉出者幼曾孫女二先生所謂子孫庶幾
當不下千公之門矣葬于新阡丁丑十一月二
十六日也銘曰

封君之封靈纍而然維崇令德加千人維考終
命全于天維有千文獻而傳斯爲余先生之阡
明故中順大夫青州府知府璉川施公暨

配安人沈氏合葬墓志銘

嗚呼公卒四年而葬孤以奉化令徐伯臣狀謁而余未之銘今十有二年矣每展狀歎歎而傷其有所隱也日者孤復有請而因發予之所聞當公除青州卽以京考罷罷者多名流而公與司考郎爲同年進士郎自倨其有公獨夷視之故嫌北道御史臺言南考不當狀上以制不可更而降郎調外任郎後遷浙臬憚公莊降禮公視之藐如亦未嘗與較郎竟以考罷而後死于

公既各有定論其視公何如公今可釋恨于郎
而余斯爲之銘矣公諱峻字平叔歸安人也其
先施氏著吳興唐宋多名賢元通甫生彥明彥
明生士良子謙知閩永安縣祀于名宦祠永安
子璫生封刑部主事鏗娶封安人董氏生公公
幼峯寄遇事敢任祖壘爲豪倣以諸生而力復
之比舉于鄉卒業南雍有鄒夢鶴註誤當司以
其父總制三邊故置于法後莫敢出公每痛其
莫之反也比乙未成進士授南京刑部廣西司

上事遷至郎中以曉暢典刑而掌封事科尚書
聞莊簡公凡難事務平亭公剛毅自持當堅決
莫敢撓京兆叅軍鄧鶚托城社而墨久矣人謂
不可問公竟致干法于鄒夢鶴則必平反之既
不畏強禦又不避嫌如此凡議有不合卽欲投
劾去上官第陽聽之而僚輩因將甘心矣且性
少愛獨好聲詩每謂詩至唐亦千古之良也至
于明經興則固失之千里乃問有爲之亦惟資
之所近焉耳其於格調體裁邈哉未之講在僚

輩間儼然以詩自重或不中程度直以意彈射之復不能容人短長每面折而多不堪其出青州蓋麾之矣不至顛擠憾未釋也公歸不與公事視里中閭閻若邑屋而不爲屈問至郡閣與會當座而短長之不屑與之往返莫不憚其莊城居樓如斗典籍敦彝甚具署之曰甲秀非莫逆不與登余與伯臣及曹僉憲子有俞檢校德音則嘗過飲之不啻五城十二樓之爲樂也城外峴山浮玉諸勝余輩則嘗從之游其別業秀

而野環城之鉅麗者皆不及其雅致每引詞客
對酒多與縫掖隱淪充禮引上座初肅入戶輒
手所作而揖曰幸爲不佞彈射客有請者亦然
彈射訖乃飲或自歌其詩而輒酬呼逾快也蓋
庶幾乎嵇阮之風矣自言詩外不問家人產於
族疏屬食指雖衆而必使有所沾及置田以贍
其貧產田僅給饘粥第令多種秫毋闕吾對客
具客至不戒而辦莫不靜嘉各盡醉而歸沈安
人之所倚也公以是優游而遂其志意安人之

劬勞因是有聞焉公昔夢有絜之者言其不滿六尺而每笑曰吾其不杖於鄉乎生平無他病而強半爲醒耳至病革矣家人治木而竊絜之公覺而歎天年終矣卒于辛酉夏五月之閏廿有二日距生弘治乙丑正月十四日享年五十有七安人少三歲後公一年而卒子男三長邑庠生千家有雋才娶于沐陽簿曹氏及季子宙俱穎而早卒次子官娶武進楊氏今爲國子生女五人長適陸京兆衍孫國子生元方次適

沉憲長宏男國子生如封次適張尚書永明男
舉人天德次適布政司經歷茅良男庠生一龍
次適光祿寺署丞李一夔男太學生存孫男三
孫女六公既不問家人產歲時男女饘粥大率
出安人居多甲子合葬清風阡公有璉川集行
世以其別號而名也王元美嘗稱之以如築室
器物俱完爲善締構自成一家云然其間神氣
逸邁則如其人之峯嵒焉或病公好彈射人豈
溫柔敦厚之教哉余質之雅道其何傷于公古

稱惡惡如巷伯乃寺人孟子之所作而今凡百君子則皆敬而聽之彼何人斯其非伯仲如貴者乎而蘇公之斥暴未嘗刪于三百篇則得情性之正者顧惟所感焉耳豈若世靡曼而比于鄭衛之音者輒以傳于詩教然則孟子蘇公非邪余重有感焉而取諸詩以爲銘銘曰
彼其之子邛之可直言旋言歸其詩孔碩我有酒食且以永日歸于其居宜其家室

劉太安人墓志銘

太安人中丞劉景韶母也中丞自鳳陽奔計歸
崇陽卜葬不吉改卜寶山痛不及視舍啓棺更
歛如生以隆慶己巳五月六日葬焉姪通政使
汪公宗元爲謁銘具狀按太安人名妙靜字莊
穆父處士潭潭從兄爲封都御史三子皆貴中
子爲廷尉太安人兄弟也卜者謂潭其後必有
貴徵當在次女矣潭必慎所許封員外公緡配
甘氏不宜子再儀太安人以其家而難爲詞潭
兄之妻劉氏也因以告而許之爲公之賢當以

子貴焉歸四年中丞生時君舅君姑咸嚴治饌
以進或恐不宜栗栗闕隙中俟一再下箸始退
舅姑初以其家當不能勞苦顧先平明而起乞
乞宿夜不休以故得承歡心公得顓治業其教
中丞幼卽令與內則合辟咡詔古典口授之成
誦雖就外傳歸必坐之瓦側篝燈而讀或炳薪
以繼督過之不少貸中丞嘉靖庚子舉于鄉或
諷兒當富貴毋勤其少休矣謝曰兒能得官官
爲國耳何以家爲而俾我躬處休邪甲辰中丞

登進士拜潮陽令戒之行曰女不記兒時怨家
竄女祖及女名文狀中乎邑捕逮急夜攜女荆
榛中對泣不岌岌哉今慎勿枉人爲也故令稱
平擢刑部主事有虜警守關請納避寇者萬衆
亦不忘荆榛中及之潮陽時母言也由是有能
名晉兵部員外歲癸丑上功封父母太安人禮
成進御素所服志不忘儉焉未幾中丞出貴州
僉事時論屈之勸其謝官太安人叱之曰男子
生而四方何有貴州哉乃往晉叅議治苗夷有

功晉副使防江北逐島夷甫奏捷爲太安人病
具疏乞歸養太安人走使止之曰淮海苦兵久
矣第爲賊賊計以拯民于荼毒紆

當宁南顧憂我斯勿藥矣疏不果上超遷按察
使尋又以江南捷擢中丞督撫鳳陽當積苦兵
間太安人豈不私爲子憐也乃所風勵達大體
如此每爲羣生請命祝天蚤賊寇寇平而卒嘉
靖辛酉三月二十三日也距生弘治辛亥十月
十一日壽七十一與甘氏太安人處三十年無

違言事貞外公四十八年公操切如束濕立辨
應之無失脫不厭意于公者就處率無言去惟
嚴不容人過女曹愴不平莫不中肯綮一二言
解也故稱女士成子以賢勞顯子獨中丞婦封
安人張氏孫日孚以功授武昌衛指揮僉事世
襲婦戴氏封恭人曾孫衡聘汪氏銘曰
桓桓中丞南國之紀天釐女士厥有本始寶山
之原允首巽趾寔協坤輿陰德以美

天目先生集卷之十七

吳興徐中行子與著

傳

篁溪鄭先生傳

先生名廷鵠字元侍瓊州衛人也遠祖秦汴人
紹興中以進士判湖州遂家德清其裔通者洪
武初謫戍于瓊永樂間奉例挈諸子及孫彪等
歸留長子在營歷三世無嗣彪子籥籥子順宗
來代子文從之娶俞氏生先生少警敏稍長好

個儻時或役旁午每感泣淬勵年十五受易于海先生聞其講德遂大發憤爲所奇許長女越六年嘉靖戊子舉于鄉娶之戊戌舉進士第三人服海先生知人授工部都水司主事卽上便宜司空蔣公奇其有經濟才居三年悉心經理闕豎又目不敢干以私以父艱去爲母家立後起復補禮部儀制司主事滿考贈封父母尋給事吏科轉工科以京師地震條陳黃花鎮古北口潮河川俱京師後門屬者設石匣營恐城孤

力薄請遣司馬門侍郎督之築關城增水壘夏
滂庶不爲醫秋高虜亡所乘貴州地連三藩勢
不統一總督巡撫不兩置置一控三重其權下
法便且省費京師草場并御馬等稍入領之者
率歲遷因以滋弊願三年爲限蘇松等郡以財
賦雄天下乞專設叅藩董而責成之四者皆國
大計也庚戌當大計吏疏皆手出以公正稱又
論三塗取士及黎情諸疏無慮數十上然大都
類此矣爲會試同考官能多得士主試相國張

公稱之陞江西督學副使江西故劇而督學尤
難周密章程諸生歛然宗之欲請託者輒止增
白鹿洞學田立條貫修洞志更定儒先經祠考
滿轉參政以母老乞終養居石湖爲娛母卒服
闋御史大夫御史交薦之性剛介歷官屏居闕
于謝問竟臥不起其學以正心術謹質行爲大
致不詭以要名出其門者皆畏公議慎檢押文
以意爲主而矩矱較然也著數十種凡百有餘
卷經則易禮春秋諸編他若都水蘭省掖垣學

臺石湖所撰瓊志修于癸亥之夏秋卒未卒業其辨漢史朱崖郡罷而未棄罷郡時尚有朱盧縣仍隸合浦郡漢詔猶存其綜核大抵然也初以伯之子儒爲嗣可世其家學庶子二曰化曰似徐中行曰先生以德清有篁溪爲號計偕三上南宮皆由浙西展墓蓋不忘本云余其旁邑後進庚戌辱爲門下士故能詳其家世入瓊者善醫術賙賚貧乏死無所歸殯之葬之所居至今稱爲鄭公福地及攜四子四孫歸蕃衍于湖

而其一入瓊食報于先生父每示以孤棹曰汝知一本故乎因悟仁孝之義記之故學得其大者余於其庸庸不具

杜季子傳

杜季子者杜長公之季子也長公爲邑功曹同曹疫諸曹以其妾故引長公避之長公必往必有所與俱執火竟夕爲傳七劑而以達節稱是長公之行也長公有三子當爲廣西龍江驛丞獨以季子從鄰女以杜男子少好奔焉拒之由

是人多季子。當廣西急軍興，驛之既廢，實轅濟
出代父祇役，孤身豺虎窟穴，出數百里外，督課
徭，感其意而輸之以濟。蓋長公長者，雖爲驛乎
大官，輒器之，使覆殺人獄，敢與太守亢幕府，征
蠻交檄從軍，皆恃季子在。季子能子也，有是能
子，不難于幹蠱而難陰德如其父，是季子之所
難能焉者。長公卒于驛，哀毀衾衾如禮，徭俗中
以爲異，比護喪而舟也。有喪父者求附焉，惻然
問之，其櫬在邸而却之曰：如汝父何？恐舟沉汝。

矣。蓋孑然一弱子耳。其知大義凜如也。且奉母
歸于炎荒瘴癘之鄉。而卒無他虞。人以爲孝感
喪畢。公遺產悉聽命于伯仲。獨力田具。母甘旨
雞豚鳴。適母所起。居事必啓而行。一日醉歸。母
責之曰。汝忘乃公之永訣乎。卽弗瀕於酒。且有
所爲。夜必夢長公。曰某如何。某如何。則奉以周
旋。其有懷如此。初度當長公忌。每祭悲痛。雖年
逾八十。受子太守封。三子之子十人。而曾五六
人。頽然稱太公。不受子婦上觴。每念長公。收弟

仲子維揚而爲季有室嫁從女三葬不能喪者
如其弟仲且畀亡者金不敢忘長者之盛而有
聞于伯仲伯誼誤于重獄畢力爲求直日往返
郡城三十里踰年解其難復付遺孤底于成仲
困于儒勤爲之佐畢力喪葬而推及于族凡有
誼誤不憚捐貲爲理株連繚綆不恤皆終長公
之行也每課子儒業毋忘長公志子旣起家交
於四方士得李于鱗爲長公傳長旣有術于世
惟季子似之故知有長公則稱季子云季子名

鶚字薦夫西臯其別號也。鄞人卒年八十有二。子思自青州爲湖廣副使以人言歸而喜遂奉終其天年葬于鳳凰九曲之陽。

徐季子曰杜季子爲太公矣而余爲通家子當稱爲太公然季子自拒龍江鄰女其行已聞于世里聞喜稱其少年事故亦從而季子之則長公益顯而杜氏之德遠矣。

樗園公傳

樗園公者歙長源程氏人也初以草堂而號晴

畢居士其後辟園當珠樹之塢顛嘗產芝蓋有
玉芝亭焉或曰珠園或曰芝園有蕘豎輦譌呼
爲樗園則獨引而稱之或亦呼爲樗園公云其
園皆嘉樹里客多譽之謂其樗亡有而名之亡
當也公道然曰辱客之雅貺竊美名多矣茲重
命之敢不拜嘉第芝乃間產而珠亦奇稱耳不
如樗也吾寔有焉吾少頗任俠喜以材自多客
游吳越燕趙齊魯之間好結納賢人長者魯王
聞吾名召爲引禮舍人以非吾好棄去而爲漆

園之游日微里父老爲驪而俠心未亡子弟多
誦義竟非吾好也今皆儻然而曲直任之矣能
以吾之踈散爲之繩墨哉第櫟吾園而未櫟吾
里昔之櫟里子何其多智也今吾行年七十所
而暇及於斯乎吾不知其爲菟裘吾不知其爲
寢丘吾安知後百歲渭南草臺何如也且呼雪
洞雲島之石爲愚而寓意焉爰處頤室爰居高
風堂而或憇于新甫亭過玄玄齋偃仰徐于而
登松竺館以望松蘿金竺之勝入萬花林翛然

臺三台南辛之爽而延之咫尺矣。前有大郭之
奇石壘爲道家山。每長嘯于此。挹禪月池而酌
客攜客以撫古松。而登玉芝。左白岳右黃山。天
都諸峯如步障。其岡隴皆几席下。巖巖而步霞
佩樓其振佩仙仙如也。環園之佳卉薈蔚。走鼠
鳴鳥千百爲友。皆清輝之娛賞心之具焉。故有
軒就而著園書五帙。

徐中行曰。余嘗使新安。聞有累捐千金佐縣官
費如廣陵河西及邑之于垣。又繕宗祠友于四

兄弟居廬繹紫陽家言爲讀禮考嘗護同舟游
醇卿之沒殯而收其遺文焉匪直誼高亦材具
也今乃知爲樗園公卽斯園蓋非苟然者矣而
視之樗里子何如邪公名淳字德厚其季子懋
易亦才士也與余善而樂傳其事

馬夫人傳

夫人任氏馬司徒公夫人也其先皆唐末自光
州入閩馬後移居閩中城任世東里之君山有
山陽令者永樂間爲良吏其後業儒夫人父綱

俶儻里中呼爲任翁。獨多公贈大夫長者同爲
諸生交引重任。翁有二男。每歎其不如公。獨心
負息女而足以伉儷焉。夫人幼慧。受女紅。輒解
雖盛寒暑不廢。里中有齷抵奇戲。姊輩召之往。
觀儼然對曰。琛聞之矣。越閨失度。輟業失職。矧
而觀如禮何。固辭。任翁重之以贈大夫求卽諾。
十八于歸。夫子就外傳。舅姑器新婦。命以家事。
輒無違命。綜理甚詳。於米鹽蠲嗇而伏臘必腆。
贈大夫急施予。且喜賓朋宴集。嫡姑李夫人爲。

脫簪珥殆盡夫人願佐之故得李夫人驩公計
偕北上舅及嫡姑踰月繼卒傾奩治喪不告妯
娒公歸艱葬事壹切夫人所襄也公登進士家
召賀客有請歌舞爲驩何太夫人曰否否兒森
素約亦將有所樹耳聞之毋乃蹙乎客知白自
夫人爲其賢而有禮從公爲郎甚儉以佐公廉
當覃恩稱安人公守姑熟歲歉忘寢食不內
顧夫人課童蒔蔬而躬紉絲枲旬月不外市人
若不聞守之有家也爲江右觀察使夫人脫

簪珥而將長女矣。乃歎如諸女何。矧且歸老乎。
辭返理故業。壹不具於微時。有言尚書家願予。
女子熒。夫人謝曰。我家宦薄。敢逆女于高門乎。
竟屬公之貧。交有道州大夫也。追爲子熒結世。
尚書林公女。或問之。夫人曰。匪以其盛爲清白。
耳。倘天大吾後。儀刑不在茲乎。所爲四女治奩。
皆不及中人家。每戒之曰。吾昔嫁書生。今汝輩。
公子同歸。慎勿以爲儉。吾厚汝輩多矣。當公爲。
方伯。擇姬從太夫人往。公轉巡撫。夫人從之。閱。

歲而曰今歸老亦足矣。但如諸子饘粥何。遂辭返。倭寇至登陴久者。嗷嗷。夫人罄歲入以給。及乎鄰里之乏者。窮閭莫不誦德焉。熒以公廩。嘗入太學。不忍離。夫人遣之曰。汝受邑博士業。吾輒咕咕而喜。况

君命游太學。其敢不亟往乎。夫人晚舉子而蓄之甚莊。國學貴游多熒。文雅或嘲其短於奕。及不聽佳冶之曲。熒解之曰。奕少頗善之。而枰爲老母碎久矣。且不敢理絲竹。而今安知此音者。

予故翩翩然多夫人之教也。夫人疾作，尚治家事。諸女婦請且休而遂不起矣。將卒，語爨曰：「吾三十五年而儉勤如一日，以佐君子爲清白吏，無恨。第老姑長子在萬里，不及訣而汝求冠二庶弟不及見之，奈何？復恐葬非燥壤，且將多盜，寧勿封？幸合葬而封稍如制可也。」時公爲少司徒，稱淑人，卒更衣其布袍十年所矣。故掾紳頌夫人而善內子職云：嗟乎！若銅守陴而戒厚葬，寧不矯然達丈夫之節哉！且公慎于政，外家將

有托輒爲夫人所止其莊如此性乃固然抑習之公乎卒之八年爲隆慶改元以公行在司徒贈夫人次年公入爲司徒而仍錫夫人之命論曰余聞夫人幼時有相其當貴而去任翁步之不見竊喜以爲奇徵翁善堪輿家馬公父母其所葬且預視怡山而以葬夫人卜習吉未有艾詩不云乎天立厥配受命旣固此之謂也

僕生傳

僕生者郭主事僕也主事字子長閩中福唐人

祖處士娶北嶺林氏。出父爲秀才。初以戚屬貧女媵。招游乙爲壻。不以奴畜之。以之事秀才。其叔出謀室。乙不爲之下。從秀才之尤溪。授經館里社。以秀才敬神而糞除。惟謹。歸疾俱篤。乙甦泣曰。嗟。秀才奈何舍我去乎。蓋夢見舊館社。其左右鬼來逆。旗鼓鬪。以秀才代其主也。乙強從之。登舟。鬼投乙于岸去矣。頃之秀才卒。乃信乙不誣。子長旣孤。乙憤其叔欺寡。或至於面譙。叔將笞之。不受。遂棄處士分產。攜妻及四子。

去時子長年十三自外歸遇之抱首哭曰爾忍棄我嫡孤以不能爲若主乎乃不忍而同歸約子長有室去比子長室盧氏亡何族與鄰里鬪殺人爲所訟者咸匿子長及乙不爲訟乙恐再及因辭去子長爲母病閉戶避閣上以撞戶驚母自投下就繫盧翁以衆要於路捕者知其名亡當適乙挺身追及易之縣以爲質笞鉗甚酷待爲訟者至免尋以獄瘞而卒其族連死甚衆子長非乙無幸矣迨子長仕貧而旱卒不能厚

視乙諸子囑盧氏爲主母撫之乃育其諸子之孤以生事公子生善食灰炭屢笞之乃止及冠長幹而強項喜手搏檣蒲乃聽其應募從海戍吳越大兵潰賊逐急空拳拔樹抵賊驚不敢追嘉靖乙卯其年二十四而歸島夷初犯閩入海口鎮倉皇而避主母入鎮東城二公子入田舍去城二十里許賊屯三月餘生嘗往來其間踰垣以餉主母城中驚服其壯以之爲部兵日戰克先鋒追奔千里無劬奪得賊物多卽隨手博

盡後以兵糧乏歸策羸爲傭主母時避于縣城
去海口二十里許戊午縣城猝陷生自海口質
羸僅半值云家有死者以此收之聞被虜率厠
輿吾公子豈堪此則投賊而代之人咸笑其愚
徑以挺赴城遇三酋據橋脫次日再至賊去知
主母蚤脫及公子家屬在入門不對泣而仰天
大笑已而伏地大哭蓋喜全而傷危也有骨肉
爲虜者聞其據橋勇傭之尾賊以贖爭多與直
而行未及百里聞賊再至卽還直夜歸負公子

嬰兒而扶主母山谷間關四旬乃抵郡城
娶妻甫有孕有司聞其名募之不得辭主將因
敗圖贖知其勇而鼓之寄語感主將恩公子知
其不免矣至惠安以先鋒殺五賊斬二首結其
髮負千頸伏起衆潰賊憤竝圍之力殺賊而傷
爲縛于樹叢矢亂刃膚無寸完者賊去往收糜
爛矣計至主母爲慟招魂而葬命公子祭之而
善視其妻以撫孤兒兒殤乙之諸孫仲季者在
徐季子曰僕生次公子余門人建初也每言生

輒流涕。倘有天幸。當如衛將軍。無幸而爲百戶長。亦當廟享錄孤矣。以爲人奴。乃爾。安得史爲之記哉。且追語乙。涕泗不能止。嗟乎。世有是夫。而念之不涕乎。故余記之。敢告僕臣。

天目先生集卷之十八

吳興徐中行子與 著

祭文

祭宗子相文

何夫君之奸姘兮，發靈異於帝鄉。湧珊瑚於溟渤兮，襲玄珠於射陽。荃既有此內美兮，又服之以琳琅冠切雲之崔嵬兮，撫長欽以周章。紉秋蘭以克佩兮，羌獨異乎衆芳。遂冲年而鬱起兮，勵高羽於長揚。乘青雲以翱翔兮，固時俗之所

慕乃獨與余目成兮，共抒情於毫素。曰麟鳳之
文明兮，夫寧有取於馳騫。因結蘭於吾黨兮，齊
玉轡於廣路。指九天以爲正兮，振千古之高步。
窺輪扁之巧心兮，諧師涓之神悟。揮斥八極兮，
逾橫絕而不顧。審韶頀之獨奏兮，反俚耳之驚
怖。掩蛾眉以深藏兮，倏衆女之興妬。荃故好夫
遠游兮，曾招佩於安期。知天路之嶮巖兮，遂弭
節於武夷。懷鬱結而未通兮，因發憤以陳詞。將
奇思之凌厲兮，紛電激而風馳。悅仙樂兮，縹緲

又霞章兮陸離。既托言兮垂世。遂委蛻而無疑。
獨詠懷兮臨絕。猶遠貽兮所思。豈歲星之大隱。
聊玩世而游嬉。羌長庚之暫謫。遺文采而去之。
悅幽通於太乙兮。降赤龍而迎女。駕日月以爲
車兮。叱雷霆以爲御。萬靈奉轂兮。命文昌以後。
旅。凌天地以徑度兮。復上歸於帝所。余猶憶仲
春之夕兮。數見夢於中山。荃被髮而長嘯兮。云
遠往乎崆峒。及發懷中之尺素兮。疑解組而相
從。余方倚天目而延佇兮。俄雨雪之告凶。聞靈

輒之將至今極狂走而相迎望丹旄之宛宛兮。
橫大江以揚靈恍雲霓兮。燦爛儼精爽兮。可憑
願一見兮。道意忽風雨兮。冥冥舟容與而不去
兮。若眷眷於予情懷瓊糈而要之兮。冀昭格以
告吾之精誠傷心知之委謝兮。余獨胡爲乎久
生擬投袂而從游兮。惜脩名之未成惟夫君之
好我兮。復何間於幽明願翼我以卒業兮。庶不
負於同盟。

祭南陽嵇公文

矯矯嵇宗。系自中散。龍性嶽立。超彼世觀。濟美
侍中。以身爲捍。血濺朱輪。氣振霄漢。迨宋南渡。
賢哲雲仍。曰存仁者。義問蒸蒸。肇遷餘不占籍。
吳興奕世。戴德發祥。郟丞維彼。郟丞行兼儒俠。
兄事董賢。弟畜荊璆。散金收書。遜志鼓篋。篤生
嵇公。鬱起中葉。公雖冲年。勃勃英氣。下帷發憤。
廣探精詣。屢賞之。衡業已名世。何哉數奇。竟乖
一第。身雖不造。殊操振俗。父也被誣。陷之刑戮。
竊負亡命。用奇脫獄。挺節凌霜。懷才沈陸。擢弁

交稱公益引晦鞠躬好修困窮不廢哲嗣說說
義方是誨燕翼貽安求錫爾類賓貢迫期邑方
勸駕公也翩然揮手遜謝脫蹤榮名畢志婚嫁
龍臥南陽庶幾叔夜伯子延祖鶴立靡羣談詩
匡鼎待對終軍方圖鳳舉婉美前勳公胡仙逝
乘彼白雲日墮虞淵揮戈靡及痛甚諸孤長號
雨泣行附通家義均休戚薄奠一卮豈勝於邑
祭少司寇涇川衛公文

於皇康叔肇封于衛巖巖亞卿維其苗裔天祚

明德公侯來復篤生元幹光踐初服篤生維何
降神嵩嶽甫自冲年英聲卓犖奏對漢廷賈生
籍甚詎曰少年壯猷不振爰訊于楚甘棠攸憩
操法惟允豪右讐氣入居諫垣蹇蹇庭直一言
迴輿功在社稷印笱稱兵嘯衆阻山崇朝
底定威申百蠻開府江漢江漢載清南冠立出
峴首垂名考牧滁陽我馬臧矣賓於太常日嚴
三禮揆留皇鑒廼弼士師明明憲墨臣寔執
之終始正直七命滋恭盛年嘉遯高朗令終天

不慙遺喪茲黃髮賻恤追崇式旌君伐矯矯二
龍天府嗣登衛多君子洵也有徵淵蘊耿懷時
云已究樹德垂昆業則不朽某等小子義屬通
家典刑綿邈于何不嗟廖廖莊士國是攸司銜
哀申奠登曰我私

祭大廷尉葛公文

如祖作賓于吳嘉名曰系服寵鴻臚爰及
稚川訪道方壺侯封啓土牛斗之虛天祚明德
式復其初篤生大理蚤握璠璣經傳劉向賦擬

相如弱齡高舉，與衆殊趨。展猷赤心，抗疏青蒲。
虎尾載蹈，狼跋其胡。惟

帝念忠寵，錫銅符蜚聲。藩臬振武，番禺入爲名卿。
考牧留都，秉心塞淵。駉牝竝驅，司理兩京。克慎爰書，操法平允。
接軌張千，朝方聽履。公也縣車，辭榮金馬。乞身鏡湖，維茲元老。
擅美中區，法匪純吏。學則通儒，直諫似慙。拙宦若愚，醇謹萬石。
知幾二疏，壽儕衛武。隱類陶朱，況也餘慶。接武天衢，公亦何憾。
樂哉玄廬，惜矣老成。望重黃

九思身全集 卷之六
福公垣中坼朝野嗟呼春風月旦實惠吾徒鄉
邦彝典今也則無眷言拱木遙奠生芻幽明永
畢思往神徂

祭司寇顧箬翁文

荷歟達尊蔚爲儒宗人倫品鑒甄拔章縫余幼
承婚仕同于公西曹矯矯海內人龍俾附不朽
伊誰之功寵溢瓊玖誼重景鍾匪以爲報于心
有冲載瞻遺像廟貌攸崇薄將清酒以寫我衷

祭臧茗泉文

昔稱同盟壇坫誰雄執耳載書君寔厥宗余繼
寵靈鞭弭先從載馳載驅若塞若通君守縫掖
而貢辟廱五十乃薦三上南宮文矣則優命也
靡逢遙授冠袍侈于素封未幾而逝彼蒼夢夢
賦此內美曷不昭融臧氏甲科曰有長公君之
令聞奕奕攸同矧惟諸子靈秀孔鍾爾名旣盛
爾後則豐弛而必張天道若弓豈謂昌阜未丁
厥躬感念疇昔白駒匪東桑榆云暮愴爾悲風
將一束以寫我衷山河雖邈眷此遺踪

祭郡伯姚石林文

君壯而舉名流翩翩遵晦潛伏二十九年乃登
甲第翱翔且擅百里靖共戴星獨賢緝盜安萌
奉嘗而傳稍轉比部伉直以遷一麾未入驅車
言旋杜門却掃斗室蕭然清酒嘉客色笑几筵
耆齡載育神王乃全耄而往矣胡不仙仙余自
元載求夜踰蹊願言重遊今也未捐日月云邈
如彼逝川涓滴斯須傾于九泉

祭陳獅岡方伯文

緊生才之不偶兮，雖古以爲難當。明時之誕
降兮，匪光岳其孰完。猗嗟公之矯矯兮，譬騁
之與雲鸞。騁絕塵之逸足兮，抱冲漢之脩翰。爰
乘時以拔茅兮，肆濟濟而彈冠。自通籍於金馬
兮，歲荏苒其三紀。當仕途之炙手兮，盍澹澹其
如水。豈伉儷以取名兮，奈嬖妬之可恥。斯邈焉
其鮮儔兮，宜一日而千里。顧總總以長年兮，積
資勞而迤邐。彼伊人之高曠兮，猶孤憤于積薪。
獨脩然其容與兮，甘陸沉以葆真。惟渺躬之偃

蹇兮亦踽踽以寡親曾傾蓋于郎署兮謂若友
乎古之人公亦不我迂兮時枉駕而接鄰暨司
藩于滇南兮幸叅陪于末議若龍劒之復合兮
爰同心而交臂迨求章于神都兮公屬詞以見
示每捧誦而三歎兮誦如貫之高誼嗟人生之
離合兮夫何異乎飄蓬儵相值于殊方兮蓋不
知其所從奚睽違而契闊兮戒秋而申以杪冬
乃若客歲之仲夏兮謬承乏于茲土適公之入
計兮得聚首于故里冀晤語之可常兮或破余

之疎鹵何計音之忽歸兮使余心其獨苦概窮
予之標季兮曾相知之幾何悲哲人之日以遠
兮悼末路之日波敬摛辭以洒涕兮乘高風而
悲歌倘中道而有航兮魂恍惚而來過

祭慚烏李公暨楊碩人文

奕奕仙踪維周柱史爰逮金陵徙于箬里發祥
徵君秀自穉齒甫髫而孤依于外氏如漚者身
如綫者祀邁迹亢宗克復其始族有藐姑靡怙
靡恃犯衆力扶竟存祭主道有遺金完囊以俟

客取如攜。君還若委。里有誣盜獄詞具矣。奮身
援解。竟脫株累。瓦礫視金。泰山視義。志在急人。
不必爲己。痛父蚤亡。身不逮事。賦詩慚烏。悲號
靡已。孝洽宗祊。名高閭里。固謝賓筵。韜光城市。
婉婉碩人。蚤窺圖史。誕自清門。歸于吉士。禮肅
采蘩。恩覃葛藟。琴瑟允諧。家聲濟美。濟美者何。
篤生令子。振藻東吳。揚標南紀。霧豹雖藏。雲龍
終起。維昔龐公。竝耕漢水。才雖弗章。子也膺仕。
上下千秋。庶幾可擬。矧也耄期。竝膺遐祉。偕隱

齊年錫類已侈有德弗亡有子弗死重以田公
墓文如綺

祭方聽泉年丈文

惟公詞林俊望江左魁奇公車高薦矯首雲達
余忝附驥傾蓋而知公初釋褐試政郎署爰佐
度支瞿瞿長慮出守瑞州端方仁恕豪右兢兢
旣我黎庶歷官五載鴈行而前滇南兵憲借箸
籌邊威聲翕赫貝錦流傳叅藩豈異忽而左遷
黃金可銷白壁易點貴陽之濱歲華荏苒天寧

人勝瑜豈瑕掩市虎成空公亦何忝遂徙今職
主餉閩中維是餉署寔余所官余職多曠幸代
者公成余不逮爰克有終年誼方殷同官伊邇
清樾亭間銜盃未已榮枯倚伏誰測其以慶者
出閩吊者在里惟古有記收於桑榆公適騰起
遽返舊都同袍飲泣良友則亡旅魂縹緲靈輶
戒塗公旣九泉余鬚亦斑交情二紀流水潺湲
薄言陳慤有淚其潛黃山白岳魂兮來還

祭潘中丞令兄文

嗚呼惟靈崛起吳興，靈宮振厲藝苑，憑陵仲和。
及季棣萼相承，長公是友，矩矱準繩，駢駢四牡。
龍變雲蒸，公維赤幟，誓以先登，豈謂三讓諸弟。
乃升晚偕計吏貢于王庭，臨軒高等重席，錯
經奕奕。皇畿肅肅，儀刑聞問，孔昭令宰，是靡
桂陽良牧，百里稱平，絃歌載道。璽書用旌，爰
棄百姓，計于洪城，惟茲開府，夙厚天倫，大胡不
慙，奪我伯兄，靈輜至止，涕泗哀鳴。某等感愴，罔
不沾纓，芝焚蕙歇，胡其爲情。潘湖浩汗，匡山嶂

嶸夜瞻牛斗，劍氣縱橫。星言出祖，歸于九京。敢具楚醴，藉以江蘺。臨風一奠，有淚如傾。

祭顏給舍父文

顏氏之先，爰有充國。教自孔門，世遵隱德。燁彼通籍，允爲世則。於維先生，家庭翼翼。旣敦質行，尤茂學殖。聖訓是躬，義方是力。展矣令子，克岐克嶸。明經起家，茂宰允陟。宜民宜人，宜補袞職。入侍承明，邦之司直。蹇蹇危言，岳岳正色。國是攸賴，左繩右墨。維辟之楨，伊誰之植。曰維君子，

有殺是式宜受于天求錫爾極胡然而逝如日
之吳凡百曷仰罔不心惻矧維中行不任慟惻
噫乎有皇孰豐孰嗇食報云長慙遺匪轉哀而
且榮陰騭不忒薄奠用惻既齊既稷敢格幽明
豈伊異域

祭臧一齋封君文

肅肅僖伯臧之始祖世篤忠貞昌後于魯秉禮
而南顧渚是卜明德之後其始必復惟公恂恂
覃精經術晏蹶詞場晚就徵辟不腆一官非公

所屑授經二難聿弘世業走在髫年矜睠特異
游季孟間不啻兄弟攜手先君布衣相愛各言
其子相期有待走忝前驅伯亦展翮仲雖晚遇
哀然京國

聖主加恩而翁輝映車騎滿庭牛酒相慶先君
之喪公視易簣公之悼亡走也哭泣備在肺腑
肝膽若一公愉則愉公戚與戚滇歸伏謁視履
矯矯動色稱賀天錫難老入閤幾何公乃奄徂
扶服靡由涕泣如雨古所難兼榮名上壽矧也

象賢後且不朽分屬通家義則知已河清可俟
九原難起何以致哀生芻一束又何敘心視此
尺牘

兩院祭封君太師張公文

代作

粵昔崧降曰甫曰申本于四岳楚有哲人聿佐
中興張仲孝友厥孝伊何忠於我后猗與相國
應運於荆楚材奕奕公篤厥生肆我

世宗天造郢邸爰省其邦名世以啓推恩褒
錫賁於丘園燕貽翼子龍受神孫爰弼

先皇及托顧命平章密勿師保

坤聖尚方歲月存問江陵以介眉壽萬福是承
薄海歌謠太公尚父百條是式萬姓是怙達尊
之德如玉如金以風以雅太古遺音賢仲諸昆
邦家之器借老以嬉俾昌俾熾敬聽司命完歸
天年相國請制

帝曰達權元輔之躬繫于社稷父不遑將哀
痛罔極庭有義訓實惟大忠載稽四制奪情以
從溫綸懇留卓越前典賻葬極榮達孝以顯

某等謹節江右伊邇尊慈弗克側制敬奠哀詞
上叩九閼下周六幕魂兮靈兮庶幾來酢

祭雨樓陸年丈文

維陸之先明德發祥幼節勳烈士龍文章公承
華胃曠代齊芳譬彼珠府產必夜光甫在中年
文聲奕奕弱冠未幾早推鄉國龍變雲蒸意已
巨測一第寧多七上始得水部爲郎延津出守
徑席絃歌於何不有國之股肱民之父母郡有
享堂遺愛不朽簡在

帝心質有文武乘憲鬼方用紆
南顧文德覃敷式靈鐘鼓奉諱還矣
振號增戀再起南閩徯民喜見
玄翦鯨鯢爰封京觀大海妖氛崇朝清晏惟

帝念功謂篤不忘彤弓載錫銅柱彌光
言將登汝深謀廟廊胡天不吊竟殞膏肓
吁嗟哀哉往守延津爰有享堂再監軍旅
功在旂常庭有玉樹野有甘棠曰德與功
沒而不忘維公宦游疆半閩越故侶遺氓
市離而合合若珠還離同劍

別眷念平生如環而玦吁嗟哀哉閩人雖愛不
若故鄉武夷洵美尚異吳岡雨樓舊履百年是
將魂兮別矣盡此一觴

又

恂恂陸公夙秉靈異龍駒鳳雛奕世克類庚子
計偕余忝附驥相顧莫逆愛逾同氣公甫韶年
長余一日紫馬青衫朱顏白皙光照西湖庶幾
連壁鳴鏑詞場觀者辟易屢獻未投匕上幾棄
鹽驥長號陵陽泣視余旣先達公亦晚遇憔悴

廿年各沾一第釋褐司空允宜水土

皇鑒揆留剖符劍浦攬轡澄清爭歌來暮所至
見思尸鄉桑楚

帝眷循良冰操介立飭兵鬼方敷漢威德文武
竝川化行絕域失怙東還諸夷扳泣閩廣妖氛
五兵是詰借箸行籌鯨鯢就殛捷書屢馳海波
遂息除日方登修文見逼余昔被播久困積薪
公嬰家難末路逡巡歷三十載合并于閩忽若
雙劍永別延津嗟君哀榮世所共聞策封鼎食

蚤逮嚴君，誅誅四倂，爲機爲雲，郡有血食，策有
書勲，吁嗟哀哉，惟余與公，意氣鮮偶，綠鬢論交，
逮茲白首，視藥省舍，奔走靡後，如可贖兮，百身
何有，吁嗟哀哉，草疏乞身，擬從范蠡，豈謂真歸，
神游構李，舄舄笙歌，盡樓煙雨，魂兮歸來，千秋
容與敬奠，一卮平生已矣。

祭誥封張宜人文

瞻綵婺于南紀兮，奕奕斗墟爰降靈于碩人兮，
懿德攸殊，旣閑內則兮，兼誦法乎詩書，流俗徒

嗷嗷兮竟作嬪于名儒椎布操作兮甘閭內之
拮据烝烝孝養兮浣子舍之厠踰斷機絲以勸
君子兮蚤奮翼于天衢相將宦所兮匡飭靡渝
帝綸寵錫兮光映匡廬珙兮瑱兮環珮鏘如何
遭命之奇薄兮嗟蘭夢之猶虛抱幽憂以沉緜
兮歷日月之居諸稍通問於家庭兮重慈母之
鬱紆睠宜人之孝謹兮夙昔勤劬榮華燁其始
茂兮湫中折于海隅忽太君之凶問兮曾不須
臾痛玄草之永謝兮傷合歡之早徂吊者在廬

兮暗者任途歎夫君之多艱兮寧荼蓼之可茹
維懿德與榮名兮蓋庶幾乎求圖某等辱君子
之清塵兮義如貫珠欽芳儀之比玉兮敬奠生
芻悵丹旄之西還兮四牡與俱故鄉咫尺兮從
汝姑之所居

祭范母陸太宜人文

維太宜人鍾秀華族士行夙成慈惠明淑嬪于
德門率禮敦睦以養以祀以莫不肅矯矯贈君
褒然長者宜人相之義聲滿野天畀儒宗舍董

軼賈簡在

臨軒名冠天下

奏對萬言并包

羣籍授者伊誰韋母是式入領太史編摩是力
又誰貽之大家維則南遷廷尉雋生是擬獄有
平反母心則喜賜環經筵每奏稱旨反覆
勸戒敬姜是似名世軼才母寧天授貽哲發祥
母德維茂爲

帝良弼豈惟昌後年雖有涯澤則不朽鼎食鸞
章恩榮非一金馬玉堂闥內鮮匹行忝通家義
在同恤遙冀生芻望風沾臆

祭劉中丞太夫人文

維松孕靈篤生哲輔伊誰開先曰維太母發祥
自唐克昌胤祚蹈禮稱詩蘭儀玉度言歸于劉
折節儉素撫爾象賢攜持調護翳起內臺繡衣
持斧寵命省方自滇及楚母教之忠衰職是
補簡在

帝心質有文武提衡三省用紆南顧俯念慈
幃西日云暮乃御板輿承歡幕府入奉母訓外
經戎務介福方遐胡然仙舉月冷機絲星沈寶

葵哀哀中丞茹荼匪苦言念純孝錫類南土况
也溫綸如月如耀懿德榮名標映千古某等
密邇轅門宛其在廡仰止壺儀憂均陟帖官守
是羈縻出奔赴敬奠生芻式彰永慕

天目先生集卷之十八終